

# 俄國大革命略記

---

東方文庫第八種

東方雜誌社編印  
商務印書館發行

# 俄國大革命略記



# 目次

## 俄國大革命記略


一、三月革命·····	一
二、三月革命後之俄國政情·····	一三
三、十一月大革命·····	一六
四、大革命後勞農政府之施政·····	二二
李寧略傳·····	六五
俄國社會主義運動之變遷·····	七三

# 俄國大革命記略

## 一 三月革命

俄人革命思想，蓄積已久，殆胚胎於一世紀之前。時法蘭西國體既經改革，自由民權之說，漸浸潤於俄民腦中；加以地主農奴之階級過嚴，專制政府之逼壓過甚，在在足起俄人之反感；其青年之遊學國外者，復濡染於英法之文化，不滿意於政府之所為，一八六〇年以後，乃有虛無黨之發現。初僅涉於空言，迨一八七〇年，巴黎均富黨萬國工役同盟成立，虛無黨聲勢乃漸盛。時俄皇為亞歷山大二世，頗有

高善  
勞齋



賀 15923

志於政治上之革新，知專制主義之不可持久，於是解放農奴，廢除肉刑，改良學制，施行地方自治制度，並許人民言論之自由。惟爲官吏左右所煽惑，未能貫徹其主旨；且懲於一八六八年革黨謀害皇帝之舉，復厲行專制政策，對於革新之徒，嚴加迫壓。一八七四年，虛無黨員之被捕者，七百數十人。然虛無黨之行爲，轉益激烈，屢從事於官吏之暗殺；且宣言將加害於俄皇，曾三度投擲炸彈。亞歷山大二世，乃徇大將棉利果夫之請，改正憲法，以期調和。方欲公布施行，而俄皇卒爲革黨炸彈所斃。亞歷山大二世既逝，其子亞歷山大三世嗣位，益行嚴厲之政治。人民愈懷不平；祕密結社，遍於國中；官吏軍人，亦有加入者。迨尼古拉二世繼任，虛無黨社會黨所持之主義，漸次傳播於工場勞動者之間。一九〇五年，首府造船業工人同盟罷工，政府命軍隊鎮壓，擊傷工人甚夥。人民異常憤慨，各地擾亂，因之發動。農民亦蜂起而與地主爲難。政府知高壓之無效，乃發勅令，預備立憲，並宣言信教自由。時適波羅的艦隊，爲日本所破滅，政府威信墮落。故各地騷動，不特不能消滅，且仍繼續發

生。黑海艦隊之水兵，則譁變而戕其艦長；俄迭克及洛克之勞動者，則起而與官兵交綏；高加索之亞美尼人及韃靼人，復以人種宗教之不同，互相衝突，死傷無算。各地勞動者又組織同盟罷工，數達百萬，要求政治上之自由。莫斯科彼得堡則爲暴徒所包圍，陷於孤立，全國騷然，有岌岌不可終日之勢。俄政府惕於事變之重大，一方努力於秩序之恢復，一方發布勅令，付國會以關於制定法律上豫算上之大權。十月三十日，俄皇署名於憲法，並頒令特赦政治上之罪犯。次年（一九〇六）五月十日，國會開會。顧俄政府雖名爲立憲，然對於立憲，初無誠意。開會未及三月，因下院要求普通選舉，改革舊制，分配土地，及閣員須由下院選出諸項，視爲不可行。於七月二十二日下令解散。第二次國會，亦未及兩月，仍蹈解散之覆轍。於是俄政府壹意禁遏民權。因第一屆第二屆選舉，民黨議員之得占多數也，特予以限制，行間接之選舉法，奪農民之選舉權，以擴張地主之權利。波蘭高加索西比利亞之代表者，各減其半數。市街之代表，則從三十九員而減爲十九員，其結果政府黨十月黨

(因十月三十日之詔勅，故有此名)得占多數。於是議會與政府，沆瀣一氣，而民黨之勢力頓衰。俄政府對於議會之防護，既如此矣，其對於一般人民，則監視尤酷。自一八八一年以來，有多數地域，日在特別防範之中。一九〇五年之後，雖着手立憲，然施行戒嚴之區域，實占全國之大半。戒嚴法許官吏便宜行事；省長得任意訂立條例，自由壓縛其人民。且其條例，隨各地官吏之意見而各有不同；在甲省所許可者，乙省或懸為厲禁。人民一旦涉足省外，動則觸陷刑章，而條例之外，又有所謂行政手續者，別無條文，苟違官吏之意志，即可以行政手續之名詞，驅之出境。俄民畏首畏尾，日處此水深火熱之中者，蓋已久矣。歐戰既興，國民雖一意對外，未聞有若何之激動；然國會議員，則以感受戰事之刺激，及政府處理戰事之失宜，頗改其曩日之態度。從前之袒助政府，或主張與政府調和者，至是多與民黨表同情。多數國民又以波蘭方面，屢次失敗，頗懷不信任政府之意。俄皇雖於戰事發生後，宣告將尊重民意，並許波蘭芬蘭等地人民以自治之權。然空言而無實事，不足挽既渙之

人心且對於人民代表之下院，依然疾視。一九一五年，因各政黨聯結大同盟，擬向政府提出改革政治之條件，復將下院解散。嗣是而後，政府議會，嘗相齟齬；內閣總理，因之四易其人。庫利津內閣仍不滿人望。一九一七年一月二十五日，爲議會開會之期；閣員恐招下院之非難，外交財政商務陸軍諸大臣，自十七日以後，相繼辭職。政府乃將開會期延至二月二十七日。然此延會期中，絕無與議會調和之計畫，惟汲汲於壓制民黨之準備。故民黨益懷惡感。適因糧食問題，釀成民警交鬭，於是革命風潮，遂一發而不可收拾矣。

先是俄都因交通阻滯，食糧缺乏，薯芋之價，大於往時八倍；其他食品，無不奇昂。俄民之購麵包者，日必露立於冰點下四十度之奇寒中五小時，僅能購得少許。飢寒交迫，怨聲載道。三月八日，諸工場之職工，因此罷業，結隊遊行街市；飢民附和之，人數愈聚愈衆；然未至於暴動也。政府事前既未爲籌備，事後又不出以撫循，惟知用武力以事鎮壓，警察不敷分布，則復調憲兵及哥薩克兵以助之。然人民之氣焰，



愈激愈盛，有多處之麵包店，均被搗毀。九日，礮兵廠之工人，亦相率加入。十日，俄都司令官出示，禁止民衆之集合。其不從者，准軍隊開鎗。然軍隊多有表同情於民黨者，或放空鎗，或以實彈向空施放，故死傷無多；且哥薩克兵巡邏街市時，人民對之歡呼，兵士有脫帽答禮者。惟警兵頗效忠政府，發礮傷斃民衆多名。十一日，俄都司令復出示，限工人次日照舊上工，否則當強制而送至戰地。此示一出，形勢更形危急。十二日，俄都近衛軍海軍及其他軍隊，大部分均加入於民黨。市內各處，均發生小戰，殺死軍官數員，襲擊兵工廠。民衆手執赤旗，遊行街市，焚燬多數之警察署刑事本部裁判所及偵探總機關部，占領克萊斯蒂監獄，釋放政治犯，關於政治上人物及政社等之記錄，悉付一炬。於是罷工之風潮，遂一轉而爲革命之行動矣。當八日同盟罷工勃發時，首相庫利津氏，於晚間召集各大臣，及上下兩院議長，俄都縣會議長，俄都市長，開臨時緊急會議。決定將食糧供給之事務，委市參事會辦理。然時機已遲，無可補救。九日以後，閣員均出席於國會之議場。十一日，（或云九日）下

院開祕密會，議長羅翔柯氏宣言不信任內閣。政府仍用強硬手段，命議會停會至四月間。下院議員因大局危急，即於十二日開特別會議。決議不承認此項命令，組織臨時委員會，舉下院議員十二名爲委員，而以羅翔柯爲委員長，以處理時局。執行必要之舉動。自是而民黨遂以下院委員會爲機關。兵士平民均先後歸附；多數軍隊亦向該會表示贊同。該會旋即致電俄皇，告以現情，請速擇一人組織新政府；並分電參謀總長亞力克錫夫及統帶大軍各員。嗣得數處覆電，表示同意。委員會遂又電促俄皇速定大計。時俄皇方在前敵督戰，聞變還京，中途得委員會長羅翔柯迫請退位之電，及內閣辭職之電文。初擬組織責任內閣，以期與民黨調和。羅氏堅執非遜位不可，而尼古拉大公（俄皇之伯父高加索前敵總司令）暨前敵各司令來電，均持遜位之說。且扈從軍隊均不肯向俄都前進，欲回前敵，而後方鐵路又被切斷，乃徇衆請，於十五日夜半下詔遜位，聲言不願與皇太子離居之故，特傳大位於皇弟米哈爾大公。然米哈爾大公宣言，則謂須俟國民會議由選舉的國會宣

布承認彼繼大位時，始願就任。故一切政務，仍由委員會主持。委員會於十二日成立後，即於十三日組織臨時內閣，其閣員如下：

總理兼內務總長

爾伏夫

陸海軍總長（兼任）

古克各夫

外務總長

米留柯夫

交通總長

密加拉瑣夫

司法總長

克倫斯基

農務總長

新加賴克

商工總長

哥奴伐羅夫

教育總長

麥牛洛夫

財政總長

鐵列聖哥

會計檢查院長

哥色納夫

其舊內閣諸閣員，及上議院正副議長，與重要官吏，多爲民軍所拘捕，分禁於下院暨彼得保羅墩臺。旋有數人，卽經釋放。十四日以後，俄京秩序，稍稍回復。自革命消息傳播後，莫斯科首先響應，軍官皆宣言效忠新政府，並組織陸軍委員會，辦理維持治安供給糧食諸事。莫斯科總督及警察憲兵千人，均被拘禁。旣而克朗斯太特加柯夫尼尼洛夫哥洛數省，亦宣布贊助民黨。嗣由羅翔柯氏將委員會成立情形，通告全國；并將政權移於委員會之事，報告陸海軍各司令官，勸其努力繼續戰爭。當革命發生時，俄皇后居柴斯柯西洛宮，大勢旣定，卽由新政府派兵前往駐守，舊時衛兵悉行撤去，并派代表赴俄皇駐在地，監送之回京。各宮之帝國旗幟，均已除去，代以紅旂。新政府復發表內閣政策：（一）卽行大赦，政治宗教之罪犯；（二）言論出版結社之自由，勞動團體之組織與同盟罷工之自由。此等自由，除軍事及專門之事情外，官吏軍人，均得享之；（三）廢除社會宗教上國民之限制；（四）卽行籌備召集用普通選舉制所選之制定憲法會議。復於十八日致電駐外各公使，聲言

新政府關於外交政策，當依據前政府所定之國際義務；尊重俄國之然諾；且留意增進俄國與友邦聯盟國諸國民之關係；俄國與協約國之結合，始終不變，決當繼續戰爭，以期最後之勝利。十九日，又發表宣言，申明遵守國際同盟及條約；且依普通選舉，召集國民議會。由是俄國革命，遂告一結束，溯自同盟罷工以來，纔及旬日也。列國對於此舉，均表示好意，美國首先宣布承認，英法意三國，則於二十二日由其駐俄大使，以其本國政府承認俄國臨時政府之意，照會俄國外交部，我國政府亦於月杪致電承認。

三月革命之成功能如此迅捷者，蓋有二原因焉：一為親德之反動，二為受貴族軍隊之贊助。俄國自彼得大帝以來，即有德國勢力之侵入。迨併吞波蘭後，因波蘭文明勝於俄國，恐波蘭人之不易帖服，乃歡迎德國移住之人民，以行其壓服波蘭之政策。於是普魯士人之移住波蘭者，日益加多。勢力漸盛，語言風俗，幾為德意志所同化。其結果，波蘭之農業，大半歸於德人之手；而俄國農民，受其擠迫，乃漸次移

住於西伯利亞。政府不察，轉揭棄其開發西伯利亞之主義，勵行東部之移民。農民拋棄其墳墓及氣候適宜墾植已久之波蘭而遠移於嚴寒荒落之境，實非所願。故其怨恨德人，至深且切。開戰以來，敵愾之聲，所以瀰漫於全國者，實由於此。然政府之內幕則反是。雖主張決戰者，不乏其人，而要津中含有親德之臭味者亦復不少。佛鐵氏斯託利賓氏均爲親德派之巨擘。嗣後執政柄者亦多係親德之一流。彼等均以維持專制爲目的，以德之政體，與己相宜，可以鞏固其地位，保持其政權也。故對德關係頗爲密切。加以俄國皇后爲德國黑塞大公之女，宮庭之中，亦潛有德意志之勢力。親德勢燄因而愈張，傾軋排擠，常所不免。俄皇雖知親德之不宜，願爲左右所欺蒙，其政策每難貫徹。然議會民黨之多數，則主排德而親英。政府人民，極端反對，戰事開始而後，政府不特不改前此之方針，且於舉國仇視德國之秋，忽有與德構和之運動。俄國人民，雖未必盡解共和之真義，欲求政治之自由，而排德熱誠則盡人同具，與吾國曩時之排滿觀念相類。故一旦爆裂，全國從風，捷如影響焉。此

一因也。俄國皇族，素爲人民所崇敬，而全國軍權，又多隸於皇族及貴族之手。苟二族堅持反對，則革命之舉，必有幾許之阻格。乃不意變動初發，皇族貴族絕無抵抗，禁衛軍者，皇室之拱衛也。其將校皆貴族中人，而統率之者，則爲俄皇從弟幾爾大公，宜其翊贊皇室矣。詎下院委員會成立後，幾爾大公，卽偕同該軍司令及將校一隊，至下院宣稱禁衛軍及彼得格勒艦隊水兵，均願聽候下院調遣。俄都所以立時底定，無激烈之戰爭，幾爾之力也。又尼古拉大公者，俄皇之叔父，負軍界之重望，國民所仰爲軍神者也。全國軍界之行動，惟大公之馬首是瞻。曾任俄軍總司令，在德俄境上作戰。其後調駐高加索。使彼對於革命或持異議，則雖幾爾贊成，俄京安謐，而各地軍隊，羣起反抗，則動亂延長，必所難免。乃彼對於民黨此舉不加阻遏，且致電俄皇，勸其順從民意，從速退位。於是全國軍隊，寂無反響。論者謂二人之所以出此之故：幾爾大公則因其曩日結婚事件，與俄皇感情不諧；尼古拉大公則因前此曾受親德派之排擠，由波蘭前敵移駐土境，故欲借革命以勦去德國勢力。此二因

也。

## 二 三月革命後之俄國政情

自革命後俄國國民對外尙能一致，雖德人竭力運動媾和，而作戰方針，迄未稍改。惟國內各黨系對於內政之意見，各有不同。略分之可區爲二派：一爲下層階級之社會急進派，勞兵團農民團屬焉。一爲中產階級之保守派，立憲民主黨系十月黨系并武人等屬焉。而當時之臨時政府，則以社會急進派爲基礎而成立者也。國務總理克倫斯基氏當革命告成時，被舉爲司法總長，曾決議廢止死刑。嗣改任陸軍總長。七月，繼爾伏夫氏爲國務總理。其政治之設施，頗含社會主義之色彩。在軍事上之措置，與陸軍總長薩微柯甫氏將軍柯尼洛甫氏之意見屢屢不諧。薩氏因之辭去陸長之職。故武人派之一部分對於克氏頗懷惡感。而立憲民主黨亦不善克氏所爲，時有反對之舉動。克氏爲緩和紛糾計，乃允立憲民主黨之提案，於八月



二十五日，開全俄國民大會於莫斯科。到會者爲國會議員，農民團，勞兵團，各地方行政委員會，各都市代表者，都市聯合會，地方自治團，商業團，銀行團，教育家，勞動組合，陸海軍，宗教家，國民團糧食委員會，農業組合，協同組合，職業組合，政府委員，莫斯科司法官，官立學校等，共二千五百餘人。國務總理克倫斯基及財政內務農務交通商工勞動郵電各總長均到會。克倫斯基氏宣言：俄國破壞之時代，今已過去；此後當亟謀建設，宜使政府有絕對之權力，俾得整飭內外之秩序。而財內工商各長，亦於俄國內政財政商工業之悲觀情形，有所陳訴。其反對政府之柯尼洛甫將軍則演說軍紀振肅之必要，並切論俄國軍隊之腐敗，由於廢止死刑。詞氣之間，含有攻擊總理克倫斯基之意味。而與會之國民代表，亦復各持其意見，互相爭論。在勞兵團農民團方面，仍堅持死刑無復活之必要，且否認陸軍制所主張施行嚴刑以改革軍紀之提議。而其反對派以立憲民主黨爲中心之中產階級則以現政府當局，無救濟國家之能力，希望以豪邁果斷如柯尼洛甫者主持國政。雖經布利

修谷夫加耶女史，苦魯巴金公，布列范諾夫氏等相繼演說，諄勸中產下層兩階級，發揮互讓之精神，協力處分國事。然自開會以至閉會之五日間，對於緊急之實際問題，不見具體之解決。所可稱爲意見一致者，僅（一）充實兵備，振肅軍紀；（二）繼續戰爭；（三）調和諸階級意見之反撥等數事而已。是會也，在政府方面，雖仍能維持其現狀，而各階級各黨派之爭論，終未發見妥洽之餘地。因之國內之紛糾，較前轉形激烈。九月上旬，柯尼洛甫將軍遂向總理克倫斯基氏要求授與支配文武之全權。克氏不允，且褫柯氏職，以格倫薄士幾將軍代之；並於俄都及其附近下戒嚴令。柯氏不肯服從，率其所部哥薩克兵，自鋪斯谷夫進迫俄都彼得格勒。當時有力之武將，多表同情於柯氏。格倫薄士幾不特不受繼任之命，且與其他將軍數人，咸取左袒柯氏之態度。克倫斯基遂改任亞歷細夫將軍爲總司令官。亞氏復以他故辭。於是克氏乃自行兼任，而任亞氏爲參謀總長以輔佐之。當時協約國之輿論，頗表同情於柯氏，謂柯氏決非叛逆者。其要求支配文武之最高權，乃救濟俄國必要

之手段。對於克氏，雖亦諒其苦心，然以其爲勞兵團所左右，則頗懷不滿之感。柯氏既有此聲援，且得國內一部分軍將之讚同，故克倫斯基之地位，頗形危險。但克氏竭力應付，且得勞兵團之盡忠擁護，形勢漸以挽回。柯氏軍隊，既進迫俄都，未能得勝，企圖全歸失敗。此時克氏地位，固未受動搖，及過激派之李寧起，克氏始不克安於其位矣。

### 三 十一月大革命

俄國柯尼洛甫將軍失敗以後，勞兵團之氣燄，因之愈益伸張。但其時過激派之社會主義者，盛唱共和主義說，以煽動民衆。臨時政府鑒於事態之危急，迺由克倫斯基氏於九月十四日在莫斯科議會，宣布國體定爲共和制。並宣言以維持秩序恢復戰鬪力爲目的。當任五名之執政官，以處理國政。且廣羅各階級人才，以爲閣員。夫俄國之國體及政體，本當由十二月十一日召集之憲法制定會議決定之，非

臨時政府權能之所及。惟立憲民主黨系暨社會黨中之過激派，實居俄國國民之大多數，彼等咸主張共和制，故臨時政府遂毅然爲決行共和之宣言，冀以杜絕紛亂。同時並組織由五名執政官而成之軍事內閣，以克氏及外務總長德里斯臣哥，郵遞總長尼基丁，陸軍總長威爾好斯基，海軍總長惠爾得列烏斯基五人任之。嗣爲勞兵團所干涉，不能成立。當克氏之宣布共和制度也，勞兵團亦發布宣言書。其大致：（一）確定民主共和制，（二）廢止土地所有權，給與貧困農民以農業上之需要品；（三）生產分配權，歸於勞動者，石油石炭金屬暨其他重要工業，悉歸公有；重課資本家及財產之捐稅；行戰時利益之沒收；此外復提出急需實行之政策數條。除第一項共和制已由克氏宣布外，其他各項，均非俄國現勢所能行，且爲立憲民主黨等之中產階級所不能容認。克氏雖恃勞兵團爲聲援，然對於是等要求，殊難允許。九月下旬，勞兵會大會，對於克氏投不信任票，克氏遂辭去該會委員之職，與中產階級提攜，以靳維持將墜之勢力。克氏本主張廣羅各黨人材以爲閣員者，其

時適內務勞動司法外交各總長均先後辭職，遂擬乘此機會，改組聯合內閣。九月二十八日，俄都開民主團體大會提議內閣問題。過激派代表者主張排斥中產階級，組織純粹的社會黨內閣。社會民主黨中則有贊成聯合內閣而拒絕立憲民主黨員之加入者；亦有謂立憲民主黨未嘗不可加入者。社會革命黨則希望中產階級之加入閣員。各黨爭論，至爲激烈。對於聯合內閣問題十月二日最後之投票，多數否決。旋由穩和派向各方疏通，三日再投票之結果，贊成者七百八十六票，否認者六百八十八票。聯合內閣案，始克告成。嗣經克倫斯基氏與中產階級各派協商後，於十月八日發表閣員，其中雖有立憲民主黨員三四人，然內閣實權，仍操諸社會黨系之手也。聯合內閣既成立，因國事之臨機處置，不可無代表民意之機關，而憲法會議之開會，尙須日時，臨時政府乃決定開設假國會。十月十五日公布俄羅斯共和國假國會條例。其主要之條項：議員人數四百五十名，中有資產階級百二十名。俄曆十月七日（普通曆十月二十日）開會。憲法會議開會之一週前閉會。屆

期開會於亞林斯基宮，舉亞扶克塞采夫爲議長。然過激派則以此假國會爲非合法的國家機關，不過爲無責任假政府個人之會合，拒絕列席。溯自柯尼洛甫失敗後，勞兵團中李寧氏一派之過激派，聲勢陡張。動輒以該黨之政策，強迫政府以實行。克氏患之，曾擬遷都莫斯科以避該派之干涉。經該派激烈反對，事不果行。克氏既辭該團幹事之職，其中央會會長崔意什氏亦不以過激派舉動爲然，與該團脫離關係。繼任者爲脫洛斯基氏。由是勞兵團之全權，悉在過激派之手中。該派既反對假國會，以後卽與假政府立於對抗之地。十一月六日，勞兵團革命軍事委員，向俄都軍管區司令部，要求兵權讓與，兩方遂開慘烈之爭鬪。俄都守備隊及海軍袒助勞兵團，八日午前三時，假國會所在地亞林斯基宮爲過激派所占領，並占俄國官立通信社電報總局官銀行。內閣閣員大多數均被拘捕；克氏先於七日假裝水兵逃出都城；彼得格勒遂爲勞兵團所占據。同時莫斯科亦起爭亂；波羅的海艦隊及利維爾之勞兵團等，皆先後響應。過激派既占俄都，其首領李寧氏，提出三大問

題：(一)新政府當先令戰爭終止，向交戰各國提議休戰；(二)土地分配於農民；(三)亟當討論現下國內經濟的危機之解決法。並以勞兵團中央會之名義，頒布宣言書於各地之勞兵團；其大旨：(一)委政權於過激派；(二)免除政府吏員之職掌；(三)釋放曩日被逮之農民委員，而拘捕曩日逮捕農民委員之吏員；(四)全廢死刑；(五)確保戰線上之政治運動自由；(六)釋放因政治而被捕之革命派將卒；(七)緝捕前閣員某某諸氏。此外更發命令，通緝克倫斯基。同時克氏則於浦斯可夫設立總司令部。十一日率領軍隊，進攻彼得格勒。初時頗占勝利，在距離俄京三十八英里之加乞那鎮暨薩斯柯塞洛兩地擊退過激派之軍隊，進至距京五英里之某地方。嗣以過激派軍隊麇至，共約一萬六千人。而克氏所率之哥薩克兵，僅六千五百人，遂為過激派軍隊所擊敗。向巴夫洛夫斯基及加乞那方面退走。莫斯科暨基斯夫地方亦有戰事。過激派既擊退克軍，即在俄京組織政府。李寧氏掌握政權，任勞兵團中央會長脫洛斯基為外交總長。主張與德國構和。以公文通告駐俄

各國公使，建議各戰地立即停戰，以便磋商不兼併土地不要索賠款之和局。並以  
前敵總司令杜柯林將軍不允提議停戰，罷免其職，而以克里倫柯繼之。且解散贊  
助社會黨代表之軍人委員會，設立革命黨公判處，撤廢法庭與律師，而以該公判  
處代之。宣言所有田地耕畜農具農場之產品及建築物，皆作為國家產業；民間不  
許私置田地；地主之房屋改作公共學校醫院休憩所及劇場。時適全俄開始選舉；  
過激派宣言：苟該派不占多數，則國會必被解散。杜柯林將軍雖被罷免，然不允交  
出前敵總司令之權；克里倫柯氏乃率兵前往圍困司令部。十二月初旬在摩希勒  
夫激戰，杜柯林氏被戕。於是前敵乃開議與德停戰，雙方代表在特文斯克附近會  
晤。議定七日至十七日之時期暫停戰事。嗣又展至次年一月十四日。羅國軍隊初  
不贊成，旋為在羅境俄軍所敦迫，遂亦與敵人定停戰之約。惟俄國國內各地時有  
戰爭。杜柯林氏之司令部雖被降伏，然該軍有衝鋒隊九千人，於司令部被圍之先，  
由摩希勒夫開往高加索，在比爾哥洛特附近與過激黨之軍隊交戰。又柯尼洛夫



將軍本拘禁於布柯夫城，十二月二日，由高加索兵救援出獄。柯氏即率哥薩克兵四百名，逃至哇沙，號召軍隊，得混成隊三千人，在唐恩境內宣告備戰。於比爾哥特附近與勞兵團之軍交綏。而在烏拉爾境內之杜吐夫將軍，烏克蘭境之喇達將軍，高加索之加拉夫將軍，均擁兵與過激黨軍隊抵抗。太瑪洛加哇倫堡唐恩等地方時起衝突。且俄羅斯南部尚在統帶哥薩克軍隊之加里定將軍勢力之下。此時之俄國幾於無處不戰爭矣。

#### 四 大革命後勞農政府之施政

一九一七年十月，李寧黨既掌握俄國政權，當時其反對黨曾譏之爲三日之天下。然產生於嬉笑怒罵中之勞農政府，竟能支持不墜，當此四面楚歌內外反抗之際，居然能樹立社會主義之共和國，而不動搖，洵不可思議之現象也。茲特記述在勞農政府治下之俄羅斯本國之現狀，及社會主義之勞農政府施行如何之政策。

## 教育方針

勞農政府於主義上雖偏重體力而輕視智力，但並不為體力而完全沒却智力。當李寧黨初得天下掌握政權之時，因急於鞏固本黨地盤，確定政府基礎起見，日夜奔走，無片刻暇，致於教育方面，不克兼顧。迨政府之基礎已確定，國內之秩序已恢復，於是藐視智力之勞農政府，亦明認智力之必要，對於教育事業，亦極端注意。勞農政府之教育方針，當然採用社會主義，以鼓吹及宣傳社會主義為教育之一目的。凡陸軍學校，職業學校，徒弟學校等，皆添設一科目，專授社會主義綱要；又以鼓吹社會共產思想使普及於一般國民為宗旨。特設學校，專養成宣傳社會主義之人材，曰社會主義宣傳者養成所；校中專設速成科，養成社會主義之人物，畢業後，即派往全國各地，宣傳此主義於農民職工勞動諸社會，一如牧師之傳教。勞農政府既於教育界大施革改，而行其社會主義之政策，則對於舊式教育，亟

須實行根本改革，可不待言。於是政府，即以興統一勞動學校爲進行改革之第一步，遂發表其學則。此項學則，足以窺見勞農政府之教育方針。其第一條云：『隸屬於勞農共和國管轄下之各種學校，盡改稱爲統一勞動學校。』茲將統一勞動學校之性質，略述於後。

統一勞動學校，係採二級制：一級收容八歲至十三歲之男女學生，五學期畢業；二級收容十三歲至十七歲之男女學生，四學期畢業；並附設幼稚園，收容六歲至八歲之幼童，施以教育。因小學校爲義務的國民教育，故已達學齡之兒童，其父母有必須送入學校之義務。俄國學校，無論大中小三等，向設聖經班，於講授聖經時，並授宗教上之道德，一如吾國學校之有修身科。充教師者，爲俄國國教正教會之僧侶。但勞農政府因標榜政教分離，信仰自由，主張社會主義，故全廢學校中之聖經班，無論何教，一概不准傳入學校。

新定規則，一教室內，學生不得超過二十五名以上，不得在家庭補作答案，不得

處罰學生，考試祇有入學與畢業兩種。

### 小學教育

勞農政府除公布統一勞動學校令外，又設社會教育部。社會教育部所發表之綱領中，有如左之一節：

勞農政府學部以養成新人（即社會主義的社會之人員）為目的，欲依新主義改革小學校，並於家庭教育，亦大加注意。

社會教育部之所有事，在改造舊時幼稚園小學校為統一勞動學校之預備科。對於小學校學生之教育方針，在使彼等將來人人能為有用之勞動家或職工，養成具有相當勞動能力之人材。為啓發兒童人格起見，使各小學校學生之學校生活，漸含有家族性質；廢除校役，校內掃除等事，依學生之年齡，由學生分任之。又在各地方，設置專任醫生，監督兒童之生長。兒童達學齡時，即令入社會教育

部直轄之國立小學校，低能兒入特設之低能兒部，病兒入療病院。

勞農政府對於舊時之高等學校，亦大加改革。如一九一八年九月十五日，在莫斯科設立社會主義大學院，又建設可稱為勞動藝術院之學校，教授一般藝術，由國庫撥款補助。此外又創設礦務博物等專門學校。其後俄京大學校學生會議學生自活法，決議請政府制定一般勞役法：學生每屆暑假，全體為國家服務，不取酬金，在平時每日減少求學時間三小時，為國家服公役，而以學費由國庫供給為報酬。一九一八年秋季新學期入俄京大學之新生約有三千名之多。

### 教科書之缺乏

全俄國各學校整備之不完全，及生活費之增高，為當時俄國學生感受困難之最大原因。而學生感痛苦最甚者，為教科書之缺乏。俄國革命以後，人工昂貴，紙墨缺乏，全國印刷所，幾無不停工，欲出版一新書，在俄國為最難之業；偶出一小冊之

新書，定價非常昂貴；二百頁以上之新書，殆從無出版者。因此，自革命以後，新聞雜誌，寥如晨星，在學生一面，甚為不便；無論何種教科書，自革命以後，皆完全停止再版。故中小學校等，皆用舊書，以致舊書非常珍貴，價亦飛漲。例如出版時僅售價一羅卜之教科書，漲至二十羅卜，破損之舊書，亦得售善價。不正當之舊書販賣店，更利用時機，預先以廉價收買教科書，而高價出售，以遂其牟利之目的。於是貧苦書生，不復能購買教科書矣。

俄國各學校，有鑑於種種困難情形，且為抵制不正當之舊書販賣商起見，特公同組織教科書介紹部，介紹各種舊教科書於學生。西伯利亞之有志家因俄國出版書籍困難，欲圖救濟起見，遂有至日本印刷出版書籍運往本國供給學生之計劃。在大阪橫濱上海等處，印刷教科書文學書等，運至西伯利亞轉運俄羅斯本國。

## 莫斯科

俄國之京城以前向指聖彼得堡而言，後指彼得格勒。今歐俄既爲李寧政府所統治，將其中央政廳，設置於莫斯科，則當然應稱莫斯科爲俄國之首府。一九一八年因彼得格勒瀕於危險，各部官署，相率由該市移至莫斯科。將著名之克力穆林宮殿作爲李寧政府之所在地。莫斯科所有之大建築物，概被徵發，充作官署。原有斯魄司基兵營則改爲中國赤衛軍之兵舍。（由在俄中國苦力編成一軍名曰中國赤衛軍）其警備市內維持秩序之民兵，皆御特別制服。市內之圖書館美術博物院等，均照舊完全保護。

俄國革命以後，因印刷材料缺乏，以致出版事業，十分之九，業已停止。新刊書籍，竟至絕跡；通全國書籍之缺乏，與糧食之缺乏，同爲國民之一大苦痛。李寧政府爲宣傳其主義起見，覺振興出版事業之必要，因創設官辦中央印刷局，聘哥李基氏爲局長，出版各種文藝與通俗科學書，廉價出售，以惠學子。有某書局售預約券，刊印革命新文藝叢刊一種，全書二十冊，每冊定價五羅卜，內載當代名家所著之長

篇小說

自一九一八年春社會革命黨左派謀反抗李寧政府以來，政府即取高壓手段，禁止反對派新聞雜誌之發行；現僅李寧黨之新聞得以發行，例如全俄共產勞兵農中央委員會會報、貧民勃賴烏達等，爲其最著者。除政府黨機關報外，幾不復有報紙發行。唯圖畫雜誌吐華爾倩斯多依舊出版，可謂異數。勞兵農中央委員會會報由前露斯哥安斯勞公司之印刷所承印，露斯哥安斯勞公司今已爲中央委員會所沒收。此會報之主筆，爲著名過激派李寧之親友斯克羅甫氏，猶太人也。

莫斯科向有官立無線電報局及官立通信部，故通信機關極爲完備。凡內外一切新發生之事件，無不由通信部詳細報告。李寧政府關於歐美之現狀，媾和會議之經過，西伯利亞小俄羅斯及德奧之情形，及霍爾瓦特，哥爾卻克，謝米諾夫等相互之關係，知之尤詳。

李寧自執政以後，始終在莫斯科克力穆林中央政廳視事，未嘗出莫斯科一步。



而最高軍事指揮官脫洛斯基則因軍事上之調度，時時往返各地，殆無靜止之時。當時傳說，脫洛斯基與李寧頗有意見，實無其事。二人於其政策上之意見，容或有軟硬之差，但從無互相衝突之事；如二人果不能和衷共濟，則俄羅斯本國恐早已崩壞，不可收拾矣。

革命後一年中，俄國糧食之缺乏，物料之不足，達於極點。市民概以馬鈴薯代麵包，各種工廠，多以無麵包無原料而停工。勞動者對於現政府不滿反對之聲浪甚高，失業之人，均改充兵士。政府以歲入甚少，乃於各市各縣課軍用臨時稅，以圖補救。其總數達一百萬萬羅卜，僅在莫斯科一市所課之臨時稅，即有二十萬萬羅卜之多。

### 宣傳運動

李寧政府以宣傳鼓吹其思想主義為政府之一事業。故其宣傳運動，規模計劃

之遠大，迥異尋常；而宣傳之區域，亦極爲廣汎。李寧派之理想在興起全世界之大革命。故彼黨之宣傳此主義，不僅限於全俄國，且普及於無遠弗屆之全世界。

李寧黨擅長各國方言之黨員，前往歐美各國，捐助軍費，鼓吹革命思想，運動各國社會黨起事。其聯結最密切者，爲德奧匈及巴爾幹諸國，且其運動延及英法美等國。該黨爲宣傳運動，常不惜犧牲金錢，時時潛運鉅款，利用無線電報，與各國互通消息。德國之斯巴達克團，賴李寧黨之後援與煽動，以繼續其運動，蓋不可掩之事實。匈牙利之革命，及俄匈之同盟，皆宣傳運動之成功也。

李寧政府之對內政策，採用高壓手段。其極端壓迫反對黨與有產階級，亦可目爲一種宣傳運動。凡有反對政府之言論與行動者，悉被檢舉監禁；企圖陰謀者處死刑；掙擊政府之新聞雜誌，概禁止發行。蓋宣傳運動與壓迫反對黨政策，同時並行者也。

宣傳運動最著效驗而行之最廣者，爲言論文字之宣傳。全國各市所發行之政

府機關報，皆一致努力於宣傳運動。其社論與新聞欄之記事，均用頭號鉛字標出，以期醒目。有不喜政府之政策者，必於報上大書特書，謂為陰謀派或資本家之徒黨。各市勞兵會、赤衛軍、農民會等團體，又各有其機關報。此等報紙，關於內外之事件，全以過激派之見解，漫加評論，未免誤解事實之真相。但除機關報外，幾不復再有報紙。故俄國人民必不得已，祇能藉機關報以判斷事件。讀此種報紙者，往往不知不覺，傾向過激主義，而大變其平素之主張。政府又刊印各種袖珍小冊，及附插畫之單張，散播民間，以補助報紙宣傳之不及。

宣傳性質之演說，亦盛行全國。每遇發生時局上之問題，或有可以鼓舞出征戰線之兵士之機會，則黨中名士，例必出場，大振雄辯。脫洛斯基及俄京勞兵會長齊諾維哥夫常親赴戰線，犒勞出征軍人。有時或備特別火車多輛，周遊戰線附近，川流不息。車上懸大書各種勸誘性質之警語之旗幟；車內設圖書館，滿載書籍，任人閱覽，名曰火車圖書館；並於各處裝置活動影戲機，設新聞通報部，揭示內外各地

之電報；又設置申告部，部中備投書匣，令兵士宣告苦情，陳述希望；又從慰問娛樂方面，設法激勸軍隊之志氣；每一火車，必附以特別之名稱，大書李寧紀念車，脫洛斯基紀念車，馬克思紀念車等字樣；車中必有無數演說家，到處述慰問之詞，竭力振興士氣。李寧黨對於女界之宣傳運動，亦非常注意，而於女工農婦間，更爲注意。觀此，足見婦女在社會上所占地位之重要。李寧黨之於此種運動，可謂無所不至矣。

### 軍事情形

歐洲俄國之軍隊，分爲三種：第一種曰赤色軍，乃擁護勞動界之利益，專備與有產階級戰鬥之軍隊之總稱，其與之對抗者，即白色軍。白色軍爲有產階級所屬之軍隊。第二種曰赤色戰列軍，乃指現役兵與在戰線從事戰鬥之軍隊。第三種曰赤色近衛隊，即勞動階級之近衛兵之意。其第二第三兩種，即普通所謂赤衛軍，第一

種蓋其總稱也。

李寧政府之軍隊於政府中，特設軍事部；部中設最高軍事指揮官，其下置補佐兼代理官；軍事部中分作戰科，政治科，經理科三局。作戰科之最高機關，為革命軍事評議會，最高指揮官脫洛斯基為評議長；海軍方面，則有最高海軍團，統轄全部海軍，又另置統帥，為戰鬥部隊之指揮官。茲將幹部之人名列左：

最高指揮官

脫洛斯基

同補佐官

斯葛李楊斯基

作戰科長

斯葛李楊斯基

政治科長

尤烈納弗

經理科長

安得拿弗及靄奴喜什

統帥

華脫愛弼脫

教育總監

才華爾德弗斯基

俄國之軍事教育機關，如陸軍大學，士官學校，海兵團下士養成所等，雖不完備，而大致粗具規模，概以舊將校充教練官，學生在校時，即受俸給，畢業後，直任爲士官，胸佩星樹花紋之徽章。但智識階級，絕無願充兵卒或士官者。

當時李寧政府因四面皆敵，從事戰鬪，故須時時發動員令，以補充兵額之不足。其發動員令也，因人數太少，而施強制的動員令，全國男子自十八歲起至三十五歲爲止，悉令照動員令辦理。在戰場附近，屢次強迫年已四十之男子遵行動員令。因此動員之結果，甚爲不良。在某地方，竟至全然不肯服從動員令。又因政府施行強制動員之故，時有逃兵發現，軍官對於逃兵輒加以酷刑，戰場中發見逃兵時，即當場槍斃。兵員分志願兵與強制徵集兵兩種，前者誠懇服役，從不脫逃，後者往往潛逃。故當局者，擬採用使志願兵監視徵兵之方法，以防兵士之潛逃。

俄羅斯本國因與海外斷絕交通，全國在封鎖狀態中，故外國之兵器軍用品等，均無從輸入俄國，而國內因原料匱乏，工廠停閉，致製造軍用品，不能如意實行。亦

也。衛軍所用之兵器彈藥，尙係歐洲大戰中同盟諸國供給俄國前政府者之殘餘品

也。當時李寧政府各部之歲費中，數目最鉅者，惟軍事費，政府所定方針，爲誘致軍人起見，以優待軍人及其家族爲唯一要務。例如政府幹部，自革命以來，已陷於窮境，而獨以厚俸聘舊將校，且每月發給兵士餉銀，每名少則數百羅卜，多至二千餘羅卜，並爲軍人家族預備住宅，不收房租；此外又設各種特典，專爲軍人謀便利，皆所以獎勵人民之從軍也。

### 工業衰落

俄國本非工業發達之國，其國民之工業智識，甚爲幼稚。在大戰以前，左右俄國之工業界者，全爲德國技師，自各種工廠，及製造化學工藝器械廠，以至裝置電報建造鐵路之各公司官署中，凡需要專門知能之技術部，無不由德國技師或入俄

籍之德國技師爲之主持。俄國工業界中，德國人種之勢力，實偉大無比。然自開戰以後，德國技師即絕迹於俄國，俄國工業界頓如失舵之舟，有一落千丈之勢。爲工業界之主腦之技師既去，不但生產力因此驟減，工業界之現狀，且因此大爲紊亂。加以原料不足，燃料缺乏，工人缺少，遂愈陷於紛亂之狀態。迨入革命時代，舉國從事於階級戰爭，如狂如醉，全國之人，分爲資本家與勞動家兩大陣，互相仇視。俄國之工業界，於是根本破壞矣。

革命以後，李寧政府發布以職工爲本位之工場法案。李寧政府欲使社會主義實行於工界起見，又實施六項方法：（一）監督工場，（二）工場國有，（三）共同經營，（四）需供調和，（五）八小時勞動，（六）工資公定。此爲李寧政府之工場施設中之最重要者。所謂監督工場者，即工場由勞動家監督之意，各工場各組織一職工聯合會，令職工聯合會之委員，當監督工場之任。對於工場主人，擁護職工之利益。向來以股份組織之大工場，完全沒收，改爲國有，交付職工聯合會管理，令職工共同



經營之。其淨利分派與全體職工。每日勞動時間，限定八小時；工資依生活費之高低，隨時由政府公定之；然後再徐謀需要與供給之調和。換言之：即圖生產與需要之平衡也。依李寧之主義，若使工業發達，超過國民所需要者以上，獎勵過剩之生產，必將更求其製造品之銷路於國外，於是所謂資本主義之帝國主義勃興，遂釀成一國民與他國民發生戰爭之原因，此事甚非所宜。故一國之工業，當以能生產僅足供本國國民所需要之物品爲已足云云。

革命後俄國之工場，大半因上述之情形，或關閉，或停工，其照常開工者，寥寥如晨星之可數，政府乃特設工場關閉原因調查會，調查工業破壞之原委。僅莫斯科縣一區域，有工場六十家，瀕於關閉之悲運。其照常開工之工場，亦因原料與燃料之缺乏，每星期停工三四日。橡皮工場所需之燃料，每月須九百貨車，當時實際運到工場者，不過二百貨車而已。俄羅斯本國各工場所需之煤斤，向專仰給於峒河流域及烏拉爾地方之煤礦。工場用之重油，其產地在高加索地方。當時因此等地

方之交通，爲反過激派所隔絕，致俄國本國之工場，無從採辦燃料，故赤衛軍努力進行，占領是等地方，冀工場所需燃料，來源不至斷絕。

因工場相率關閉，致失業之人日多，此種失業職工，有攜眷回鄉者，有改至他方就職者，亦有投入赤衛軍，以圖享受厚俸者。當時俄羅斯本國，鈔票濫發，物料缺乏，生活費大漲。因此原因，職工之工資，亦逐漸增加。普通職工之工資，每月漲至六百羅卜至二千羅卜；專門職工每月須三千羅卜；而勞動社會，因工業之破壞與食物之缺少，皆有反對政府之傾向。各地時有職工與勞動者起反對政府之運動，形勢頗爲不穩。政府乃照例派兵彈壓之。

俄國各種工業，雖已停止，獨鈔票印刷局，晝夜開工，忙碌異常，俄國鈔票印刷局，向爲造幣一部，設於彼得格勒之彼得巴烏羅弗斯基要塞內，後遷設莫斯科，添設十羅卜鈔票及二十羅卜證券印刷機六架，每日印出紙幣數千萬羅卜至一萬萬羅卜之譜。

## 財政狀態

當時勞農政府有三大難關：卽糧食缺乏，工業破壞，財政紊亂是也。但此三者，非至李寧政府而始發生之現象，係繼續前政府時代之遺傳的病害，不能專以此攻擊李寧政府。俄國財政之紊亂，達於極點；自大戰以來，俄國金銀銅質貨幣，完全消滅，所流通者，惟鈔票耳。此種鈔票，每日濫發數千萬羅卜至數萬萬羅卜之多，而無現金爲之準備，故完全爲一種不換紙幣性質。

自勞農政府成立後，至一九一八年四月止，發行鈔票，共四百五十萬萬羅卜。自是年四月起，至是年七月止，發行鈔票一百五十萬萬羅卜。自七月起，至十月止，發行鈔票二百萬萬羅卜。自十月起，至次年四月止，發行鈔票六百五十萬萬羅卜。合計共發行鈔票一千四百五十萬萬羅卜，此專指俄羅斯本國之勞農政府所發行之鈔票而言。

在高加索，北俄，西伯利亞等處，又各自組織小政府，共計八個。此等小政府，亦各自發行鈔票。此等小政府所發行之鈔票，至一九一九年四月中旬爲止，共計三百萬萬羅卜。合計李寧政府及各小政府所發行之鈔票，其總數共達一千七百五十萬萬羅卜。

俄國之內債與外債，其總數共有六百八十萬萬羅卜，內中約二百萬萬羅卜，係屬於外債部分。

俄國之準備金幣，共有三十六萬萬一千三百萬羅卜。內中三分之二，即二十三萬萬羅卜，已作爲外債之擔保品，歸英法美三國保管之。其餘十三萬萬羅卜，則在國內，內中有七萬七千七百萬羅卜，當時在奧木斯克西伯利亞政府之手中。

如上所述，俄國銀幣銅幣完全消滅者，並非真正消滅，乃爲國民所隱匿也。爲國民所隱匿之現金，計金幣四萬三千五百萬羅卜，銀幣二萬八千六百萬羅卜，銅幣二千三百萬羅卜。

照此情形，俄國財政，近於破產，而羅卜價值之跌，更不待言。羅卜鈔票，喪失其正當鈔票之價值，僅不過爲一種交換籌碼，或爲一種代用鈔票而已。羅卜之價日跌，以後更無漲價之希望者，非無故也。

其時俄國財政既陷於如此狀態，欲圖救濟之策，無論如何之財政大家，恐亦難施其技。爲使內外羅卜鈔票漲價起見，不可不從收回不換紙幣着手。但李寧政府曾宣言廢棄公債，此次萬不能收回不換紙幣而再發行公債。乃不得已，發明一種救急法，即另發行新鈔票，調換舊鈔票，以舊鈔票換新鈔票時，設有一定限制，每人祇許調換若干，出於限止數以外之舊鈔票，一概作廢。此種絕妙計劃，李寧政府早欲實行，唯因缺少製造新鈔票所必需之原版用紙墨汁機器等，又因民間反對，甚爲激烈，故躊躇至今，始行實行耳。

一九一八年李寧政府之豫算案，計歲出四百六十萬萬羅卜，歲入一百二十七萬萬羅卜，故入不敷出，相去甚遠。支出款項內，最占多數者，爲九十五萬萬羅卜之

軍事費政府爲補歲入之不足起見，乃向各縣各市抽臨時稅，是年年底全國所徵收之臨時稅，充臨時軍事費者，有一百萬萬羅卜云。

### 糧食問題

當時吾人對於俄國國民最覺可憫者，即革命前後一萬八千萬生靈所身受糧食缺乏之痛苦也。糧食缺乏，生活困難，最足動搖人心，發生事變。如俄國之革命，德奧匈之革命，皆以麵包之缺乏，爲其重要原因之一。革命因無麵包而發生，但因革命之結果，使麵包缺乏之度，更日甚一日。前者，克倫斯基政府之失民心，爲李寧黨所顛覆，亦基於糧食政策之失敗。當時李寧煽動俄國國民，顛覆克倫斯基政府，何嘗不標榜平和與麵包乎？其宣言有云：過激黨掌握政權之後，立即停止戰爭，戰事既停，麵包即不至缺乏；國民爲求麵包計，宜速推翻克倫斯基政府。

迨過激黨掌握政權以後，不但麵包之缺乏，依然如故；且較前尤甚。各種食品，全

憑券發給，不能多買。其中最關重要之麵包，則視國民職業之差別，分別等級，每日發給。其量之多寡，各級不同：大致將國民分作四等，第一等，為過激勞力者；第二等，為普通職工，及為過激黨作工者，與智識階級；第三等，為一般居民；第四等，為有產階級。每日發給麵包之數，第一等約中國六兩；第二等約中國三兩；第三等約中國一兩半；第四等僅微聞麵包香氣而已。蓋過激黨原本之主義，唯用體力從事勞動職業者，有生活之權利；其非賴體力作工者，僅依情誼關係，略給糧食而已。萬事以勞動者為本位之政府，專優待勞動家，而其餘皆受虐待，固當然之措置也。

俄人所飲之茶，向用紅茶，紅茶之中，須加糖塊。但其時俄國無糖無茶無咖啡，即菜蔬魚鮮等，亦甚缺少；價值昂貴，購致匪易；肉類雖出高價，亦甚難得；凡可稱為食物之品，概異常缺乏；雖謂為日在饑饉狀態，非過言也。

俄國食物之價目，皆由政府公定，憑券出售，並由糧食委員會，依照各區人口，分配糧食。但在有糧食時，固能如券上所記之數，交付糧食，然每屆售罄時，則購求糧

食者，不得受枵腹之苦。故常有多人聚集於糧食店門前，演出騷擾事件者。又有多數奸商，屯積糧食，居奇壟斷，私售謀利者。富有之家，乃不得已，常出重價，向之購求。不但人類之食物，如此缺乏，即牛馬家畜之飼料，亦非常缺乏，於是馬車行相率關閉，停止營業。

因糧食缺乏之結果，各種食物之代用品，乃陸續出現。各專門家，頻致其心力於代用品之發明。如以馬鈴薯代麵包，以煞喀林（Saccharine 偽糖精）代糖，柯斯德陸麥市新創製糖公司，專用馬鈴薯製糖。其製法係修斯德夫教授所新發明者。

俄國之物料與食物，雖日漸缺乏，與之為反比例而日見增加者，惟鈔票一項。俄國人民之反抗勞農政府，出於不穩之行動者，全由於缺少食物。如俄京蒲鐵洛甫兵器廠之騷擾，斯可洛呼特製靴工場之暴動，無非因缺乏麵包而起。從衣食足而後知禮義之古諺言之，欲強迫過去三年間如同餓鬼之俄國國民，償還外債，履行



條約，可謂昧於俄國及俄國國民之真相者矣。

### 男女平等

男女平權，爲俄國革命之一產物。在革命當時，猶未承認男女平權，其完全予以承認者，爲李寧政府也。俄國在前政府時代，已有男女平權之運動；一九〇四年，俄京曾有人組織男女平權期成同盟會。迨革命以後，該會曾代表全國女界，上請願書於克倫斯基政府，請速承認男女平權，要求女子有選舉權，任用女子於各項公職，與男子同等待遇。至李寧政府時代，遂有女大員出現。媾和使節中，亦加入女子。自過激派女傑柯龍臺女士爲勞農政府之濟世大員後，女界勢力大振，凡演說會及公共事業等，皆有女子參與其間。當選舉運動之際，女子之活動尤著。

柯龍臺女士當一九〇四年革命時代，已爲有力之女革命家，知名於當世。女士年四十餘歲，爲某陸軍將校之女公子，女士擅長演說，且爲文學界之健者。每登壇

演說，口若懸河，力能感動聽衆。當其著書立說，或執筆報界，參加社會運動時，必立於陣前，指揮男子，誠不愧爲俄國革命之女傑。女士素所主張者，謂女子不可不獨立自營，爲求女子獨立起見，須先打破舊式之婚姻家政與母親之形式制度。俄國之女工，皆尊之爲女界之母。

李寧氏亦主張男女平等之說。莫斯科開全俄女工農婦大會時，李寧氏曾蒞會演說曰：『世界各國多賤視女子，以女子爲家庭之奴婢。勞農政府之目的，在撤除女子一切之制限與束縛，打破有產階級之婚姻制度。』又曰：『我勞農政府者，完全公認世界之男女平等之現代唯一之政府也。我政府以法律打破私生兒與正兒之差別，以前無論何共和國皆不能斷行之婦人解放問題，唯我勞農政府能實行之。』又曰：『徵諸所有革命運動之經驗，革命之成否，視女子之參加運動與否而決定。』李氏之贊助女子，爲女子吐氣，可略見一斑矣。

俄國舊式之結婚法，極爲煩累，至於離婚之舉，尤有種種宗教上及法律上之制

度，爲惱煞男女兩方面之可厭物。李寧政府特布新令，撤廢舊式結婚法舊式離婚法。此後欲結婚之男女，祇須呈報官廳可矣。離婚時，祇須雙方親到官廳，陳述合意離婚之意見可矣。自此以後，結婚者無須更至寺院，依賴僧侶，舉行結婚禮。寺院乃因此大受影響。僧侶界咸反對此新結婚法令，因向來寺院之進款，結婚禮之酬金，實占其大部分故也。

李寧政府停止對德戰鬪行爲後，即訂結休戰條約，派媾和委員，赴不列司德里多甫斯克市，開單獨媾和交涉。當時俄國媾和委員中，有名比張谷者，爲二十二歲之妙齡女子。比張谷女士，係小俄羅斯產，現任反革命檢舉局局長，曾取締反對李寧政府之有產階級及反對派之反抗陰謀，拿獲其人犯而裁判之。此外女子充當大學教授者，所在皆是，此皆男女平權之結果也。

### 猶太人之天下

俄國之大革命，產出無數奇異之現象，如猶太人勢力之跋扈，亦其一也。在俄國未革命前，猶太人常沈淪於俄國政界之地平線以下。迨革命時代，猶太人忽一躍而爲新俄羅斯之主人翁，制一萬八千萬人之死活，驟觀之，可謂不可思議之至；但一經知其由來，卽無所謂不可思議，而反覺其爲當然之現象。

猶太人向來散居於全世界各處。其中猶太人最多者，爲俄國。俄國昔日對於猶太人特設一種法律，制限其爲國民之權利，束縛其自由，如猶太人不得有地皮房屋等不動產之所有權，不准遷移至一定區域以外，制限職業之種類，不得就公職及充海陸軍將校等。故猶太人在俄國前政府時代，備受俄政府之虐待，俄國民之輕蔑，完全爲寄人籬下之人民。可知猶太人之早經成爲革命運動之中堅，而大有所活動，非偶然也。

自從社會主義之大革命發生以後，撤廢猶太人之權利制限，宣言四民平等，俄國成爲有實力之人物之活動舞臺，於是猶太人之名士有力家，陸續出現於俄國

政治舞臺。唯此輩人士，並非於大革命後，由天外飛來，突然出現於俄國者；皆在數十年前，即爲革命黨巨子，與俄前政府繼續奮鬥，扶助同黨勢力，在俄國社會中久享盛名之俊傑也。

茲將屬於李寧派之猶太系之重要人物，列舉於後：身任勞農政府最高軍事指揮官，而爲李寧之股肱，宣傳世界革命最盡力之脫洛斯基氏，實爲猶太人。其原名爲勃隆西臺蔭。俄京勞兵會長兼克拉斯那亞報主筆之徐拿維安夫氏，亦猶太人。其原名曰曷弗爾白烏摩。爲莫斯科發行之全俄勞兵會中央執行委員會機關報伊士威斯查報主筆之司臺克羅夫氏，亦猶太人。原名那亨凱斯。李寧政府軍事部作戰科長兼最高指揮官補佐官斯葛李楊斯基，政治科長尤烈納弗，經理科長安得拿弗，前任統帥克路意凌谷，單獨媾和使節總代表後爲駐德俄國大使之郁藩等，皆猶太人也。又爲俄京反革命檢舉局局長之妙齡女子比張谷女士，亦猶太產。由此觀之，李寧政府幹部中，猶太人實占其過半數。

此外立憲民主黨，有梨區報記者格生維那惠爾氏；社會民主黨各派中，有馬爾託夫、達恩、康谷夫、波得列索夫、斯哈諾夫、密拿爾、西利特爾等，不勝枚舉。又李寧政府國民經濟委員會長賴林氏，與任小俄羅斯駐德公使之臘特克氏，亦猶太人，且爲李寧之親友。餘如前任西伯利亞勞兵會極東外交總長楊生氏，及前任哈巴羅敷斯克勞兵會長克拉斯諾希曲谷夫氏，亦猶太人也。

俄人嘗怨恨猶太人，謂俄國之革命，全係猶太人之革命，俄人實未嘗與聞也。然驅迫猶太人，使挺而走險，投入革命運動者，果誰之咎乎？此決非數百年以來備受虐待侮辱陷於不得見天日之慘境之猶太人之罪，而實爲凌辱猶太人之俄國前政府與爲偏狹之宗教家所惑嫌惡猶太人之俄羅斯人本身之罪也。

李寧之著作

向來抱民主主義者，於革命之際，最忌勞動階級之執政。故此次俄國之革命，雖

賴勞動社會而成功，但俄國社會民主各派，對於斷行勞動階級之執政，由勞兵會掌握主權而樹立勞動政府之說，多表示反對之意。其中祇有李寧氏及其一派，獨主張勞動執政之說，且聲言建設勞兵會政府，於全世界開一新例之好機會。除此次俄國革命外，更無他途。

因勞農政府常恃壓制暴力斷行其政策，於是俄國社會，羣斥勞農政府之施政爲獨裁暴政，而加攻擊。德國著名社會主義者加烏茲基氏曾論難攻擊李寧之執政。李寧特著一書以答之，名曰勞動階級之革命及變節者加烏茲基（一九一八年一月出版）該書首先說明勞動階級之革命的主權之實體。其詞曰：『勞動階級之革命的執政，乃勞動階級對於有產階級以暴力征服且以暴力維持之主權也。』李寧又說明所以有用暴力之必要，及革命政府所以須用暴力維持之理由曰：『因有產階級，於特質上，於智識上，其所處地位，均較勞動階級爲優越，故欲從根本上，破壞支配階級，而實行吾人之主義，斷不可以尋常手段出之。而勞動階級

執政之必要，於是乎發生。」云云。

### 密探局

李寧政府對於反對者，常取高壓手段；遇有攻擊政府，謀反抗，圖陰謀者，立即檢舉，交裁判所，名此等反對者曰反革命，專設特別機關曰密探局，以取締此等反革命。彼得格勒與莫斯科之密探局，規模極宏大，組織極完備。彼得格勒密探局在該市哥洛霍華約路之轉角，建築壯麗異常，門前陳列來福槍機關礮等，門裏備無數摩托車，預備隨時可以出發。局長係一青年女子。莫斯科密探局，在魯皮楊卡武裝情形，與彼得格勒略同。

莫斯科密探局總局之門中，摩托車腳踏車出入其下者，終日陸續不絕。其總門口，有武裝之赤衛兵監視之。應接室中，滿列軍器，壁上貼有勿觸手槍之字條。時見乘載武裝民兵之運貨用摩托車，縱橫疾馳。入市者，即奉總局命令，出外檢舉犯人，



搜查家宅之密探隊也。密探隊中亦有女子混入其間；例如貝德羅瓦爲曾受高等教育之女子，克勒務實爲冷酷素著之女密探。

密探局長什爾溥斯基，係波蘭之革命黨，在革命以前，曾以政治犯被監禁。自什氏就密探局長之任後，受死刑之宣告者，不可計數。讀者猶憶及曩昔駐俄德國大使米爾泊赫氏在勞兵會大會席上爲社會革命黨員所暗殺之案乎？此案與密探局亦有關係。局員二名，曾因此受嫌疑而被罷斥，局內執事人員，因此大加淘汰。局長什爾溥斯基亦因連帶關係，暫時退位。又有配台爾斯者，與什氏並立爲密探隊長。

密探局總局設於莫斯科，而於全國各處，遍設分局。凡邊界之守備，鐵路及火車站兵營之監視，以至維持市內秩序等事，均由該分局擔任之。都市之分局，依照從前警察制度，有宛如刑事局之組織；其區域較廣之村落，則以騎馬民兵取締之，如從前之憲兵然。

李寧政府爲便利密探局起見，特賦與極廣汎之權利，甚至官場之消息及官吏之動靜，亦使密探局暗中監視之。密探局之勢力，乃異常偉大。雖政府大員，亦有懼憚密探局之色。此密探局，隸屬於內務部，局員由內務部任命。地方分局，雖有組織軍隊之權，但須聽地方勞兵會之指揮。密探局之經費，歸內務部支出。

如上所述，密探局之名稱，與實際甚不相符，實與警察制度無異。唯直譯其俄文之原義，可稱爲非常委員會。

### 小俄羅斯

小俄羅斯本爲過激派之勢力最發達之地。革命以後，該處人士，即主張民族自決主義，要求小俄羅斯之自治獨立。在凱夫召集小俄羅斯議會，組織小俄羅斯政府，推舉著名小俄羅斯著作家溫尼強哥氏爲首相；發布獨立宣言書。當時克倫斯基內閣，無抑止之之能力，乃遣外務部長台列西羌谷內務部長載列推里與小俄

羅斯政府議和，一時曾大起騷擾。迨克倫斯基內閣衰弱，李寧黨之勢力漸盛，小俄羅斯亦大受影響。屬於有產階級之溫尼強哥政府，遂漸為勞兵會所壓倒。勞兵會乃另行宣告勞農共和國，其勢力風靡小俄羅斯，前政府（指溫尼強哥政府）遂離凱夫而遁去，自此以後，小俄羅斯遂成為勞兵會與舊政府黨之戰場矣。

舊政府及立憲民主黨，懷恢復己之勢力及推倒勞兵會之目的，乞德國政府出兵相助。小俄羅斯之有產階級，乃逐漸親德，所謂立憲民主黨之大將米留哥夫氏，甚至公然發表親德論，而不以為可恥。但德國一方面壓迫勞兵會，一方面驅逐舊政府，使親德派司閣綠巴獨絲基將軍執政，另行組織親德政府。未幾，軍國主義之德國瓦解，司閣綠巴獨絲基將軍失敗，前政府陸軍大臣配德留拉將軍再起而占領凱夫市，指揮司閣綠巴獨絲基將軍之舊部之特尼金將軍，亦不得已而離小俄羅斯。

初，李寧派援助配德留拉將軍，以與司閣綠巴獨絲基將軍戰，但未幾即取單獨

行動，在小俄羅斯之過激派，每月收受李寧政府所給發之運動費甚多，因此亟欲窺伺時機，以圖再舉。當此之時，配德留拉將軍將依賴英法同盟國，而與赤衛軍戰乎？抑將與赤衛軍妥協提攜，取一致之行動乎？頗有躊躇不決之色。但其部下軍隊，多數已變為過激派。李寧派之宣傳運動，已大奏功效。配德留拉將軍之部下，早已與赤衛軍表示同情。於是李寧派在小俄羅斯方面再與勞兵會，而掌握小俄羅斯之主權。小俄羅斯幾經屈折，仍入於李寧派主權之下，而成爲勞農政府之一部。此實勞農政府暗中接濟軍費與其宣傳運動之成績也。

過激派所以得在小俄羅斯大施發展之手腕者，因該處係著名之農業地，居民大半爲無土地無財產之農夫。農夫與勞動家，向爲李寧派之中堅。自李寧派占領凱夫，小俄羅斯全境歸入勞兵會之手後，小俄羅斯之赤衛軍，即與勞農政府之赤衛軍相合，從事攻擊奧台賽，即將奧台賽占領。在該處之英法軍，乃不得已而撤退。小俄羅斯向有俄羅斯之積穀倉之稱，俄國農產物大半出於該處。勞農政府驟得

此積穀倉，在李寧派可謂已入小康之境。但聯合國方面，不得不受其影響也。

李寧政府自是經小俄羅斯加里西亞（加里西亞昔為小俄羅斯之一部）而與匈牙利相提攜，於是波蘭、捷克斯洛伐克、塞爾維亞等皆瀕於危險，俄匈赤衛軍與塞爾維亞、捷克軍之間，遂起衝突。赤衛聯軍，乃風靡比薩拉比亞，有將侵入羅馬尼亞之勢，故與台賽之英法聯軍撤退後，方扼守塞伐斯、托保爾要塞。

### 土地問題

俄國之土地問題，與俄國之革命史，有極重大之關係。蓋自一八二五年之台加布里斯德叛亂以來，直至今日，所有革命運動，無不以土地問題為中心；要求土地與自由，實一貫俄國社會運動之思想也。雖謂俄國之革命，為欲解決土地問題而起，亦非過言。土地問題之能否解決，與將來社會民主之運命，有最大之關係。其欲澈底解決土地問題者，即勞農政府也。克倫斯基政府，因無斷行解決此問題之勇

氣，而致衰落；李寧派因提土地問題，倒克倫斯基內閣，而得勢力。

李寧於一九一七年十月二十二日，樹立勞農政府後，即發土地問題之布告，指示解決之大綱，共計五款。大致如下：

- (一) 無代價撤廢地主之土地所有權；
- (二) 地主寺院皇族之土地農舍農具牛馬等，全部移交農民委員會管理；
- (三) 沒收土地農舍等之際，有加暴行損害者，當作重罪犯處罰；農民委員會，須將所沒收之土地農舍農具等，製成明細目錄備查；

(四) 土地問題，未經議會解決以前，依臨時法處理之；

(五) 無財產之農民及哥薩克農民之土地，概不沒收。

據上列之布告，即將全國土地農舍農具牛馬等，盡行沒收，作為國有，分配農民，使之耕作也。此項土地問題辦法，於一九一八年四月，經莫斯科所開之全俄農民大會討論決議。其決議案，曾經印成一小冊，散布全國。該法案主要部分，係關於土

地之分配及其利用方法，設詳細之規則。其根本主義，在對於具有能自耕作土地之能力者，無分男女，借與生計上所必需之土地農具等。而借與土地時，視其人之境遇而有多寡之分。單身者較少，有家室者較多。於是向來握土地所有權之貴族等，其所有之土地農舍農具等，因此遞奪盡淨。欲自己從事於勞動，又以身體虛弱，不堪勝任。至爲饑餓所迫，唯有躑躅街市，乞憐於路人而已。

自土地法案成立後，初由有教育知識之人士主持各地農民委員會，就於實際上之分配方法，從事調查研究。但未幾此等有教育知識之人士，忽受排斥，全由毫無教育知識之農民任分配之職，致實際上之分配，不能照預定計劃施行。於是農產物之收穫大減，遂成糧食不足之現狀。西伯利亞政府，乃取消李寧政府之土地法案，恢復前政府時代之舊制，將前所沒收之土地，仍分別交還原主。西伯利亞常呈不穩之形勢。農民過激派之蜂起不已者，其原因在於取消土地法案，可無疑義。農民之反對立憲民主黨，使該黨陷於逆境者，亦基於該黨之土地政策。蓋立憲民

主黨，本爲地主資本家之政黨，故其政綱中所定土地問題解決案，依然承認地主之土地所有權，主張由政府備資向地主收買土地，而後分與農民。農民對於此說，極端反對。將來俄國政界，爲土地問題，恐不免尙有波瀾也。

### 知識階級

俄國勞動社會，最蔑視知識階級，因屬於知識階級之官吏技師公司辦事員等，自從革命以來，多左袒有產階級，而嫌惡勞動家。於是勞動社會與知識階級之間，非常互相仇視。過激派掌握政權之後，官廳公司工廠中之知識階級，皆表同情於有產階級，全體罷工罷職，以爲對於職工人民兵卒之示威運動。勞農政府之方針，欲完全打破官吏公司之階級，而以劃一官吏之俸給爲改革之第一步。自大員以至局長技師門差等，皆受同等之俸給。其命意以爲：同爲人類，應享同等之供給，不可因職業而分等級也。於是官吏技師銀行公司辦事員等，不甘立於人民勞動家



兵卒之下風，執行事務，乃相率罷職罷工，以窘勞農政府。自是以後，過激派愈輕蔑知識階級，稱之曰『薩暴泰基』。

然知識階級，並無財產，罷職罷工以後，勞農政府即停給月薪及購買糧食之證券。未幾，乃不得已，依然就職開工。勞農政府，亦以無知識階級之援助，不能運用國家各機關，乃稍稍優待知識階級，增加薪水。而知識階級亦因為生計問題所迫，仍執業於勞農政府之下。

俄國之革命，將社會制度從根本上完全顛覆，不留餘地，至勞農政府成立，其政策更加劇烈，階級的競爭軋轢，無所不至。社會情形驟變，一種淒風苦雨之象，忽呈現於社會表面。有向為士官者，奔走於市，以賣新聞紙為餬口之計；有大家閨秀，女校學生，亦以售新聞紙為生涯者；或出售其家具裝身具金銀寶石首飾等，以謀生；活者；其家主等，因不動產國有法之實施，所有產業，均遭沒收；向為律師裁判官者，皆因裁判制度之撤廢而失業，謀食無策，或降為書記，為門差，苟延殘喘；或為御者，

或爲搬運夫，忽營勞動之生活焉。

所謂李寧主義者，大致謂：『生而爲人，皆有應當勞動之義務，不自己從事於勞動者，卽無生活之權利。』故爲懲罰坐食之輩起見，頒布一般勞動法，凡屬人民，無論男女，須於一定之時間，從事於一定之勞力工作，不許委人代勞。如不能自己工作者，須納重稅。故俄國街市中，常見有知識階級之人，或弱質之女子，在路上掃雪除冰，若輩作工之時，面含笑容，每工作五分鐘，休息二十分鐘，行人往往睨之而笑。俄民平日酷嗜戲劇與音樂，故政府強令優伶演劇，以娛勞動家。又無入大學資格者，亦准其隨意入大學聽講義，且命教員於演講時務求通俗平易，俾人人易解云。



# 李寧略傳

善齋譯述

當一九一七年前過激社會黨首領李寧氏等經由德國而向俄京進行之際，當時之外務卿米劉谷夫聞報之下，大驚失色。米氏驚駭之理由，觀於其後之事實，足以表明之。迨李氏一經出現於俄國京城，戰線中之俄德兩兵，即互相交驩；戰線內兵士之潛逃者，絡繹不絕；古梯谷夫，米劉谷夫兩氏即被逐出內閣；多數人士皆鼓吹不合併不賠款主義之平和論；勞動者與兵士皆大張威勢；俄國全境陷於無政府狀態。凡此皆李寧部下之過激派實爲之主動。於是『李寧者德國放射於俄軍背後之毒氣礮也』、『李寧者德之間諜也』、『吾人宜撲殺此獠』等之聲浪，乃囂然

四起。然李寧則若無其事，泰然爲今日勞兵政府之首領。李寧果爲如何人物？諒讀者甚欲知之。茲略述之於後。千八百七十年，李寧誕生於辛皮爾斯克地方，其父尼古拉佛區氏，爲該處國民學校校長。李寧幼年時代，嘗慨嘆國民教育之不振，民衆之愚昧，下層人民之貧窮，咒詛俄皇之專制政治。其兄亞歷山大於千八百八十七年，爲與暗殺亞歷山大三世之陰謀有關係而處死刑。是時李寧年十七，其受刺戟之如何深刻，可以想見。同年李寧亦以鼓吹社會主義之罪，逐出喀尙大學。千八百九十二年，李寧至京城彼得格勒，竭力鼓吹社會主義，煽動勞動團體。千八百九十五年，組織俄國最先發現之勞動機關，名曰『勞動階級釋放同盟會』，而自爲之首領。是時李寧年二十五。當時俄國社會黨之大部分，偏傾於中產階級，故其黨略對於他階級取妥協態度。李寧排斥偏傾中產及妥協黨略，而唱道最激烈之純粹社會主義。是年十二月，李寧被逮入獄，處二年間之懲役。後更被放逐於東部西伯利亞，千八百九十八年，『勞動階級釋放同盟會』改組爲『社會民主勞動黨』。

李寧在東部西伯利亞之配所，遙指揮本黨之方策。其後流刑期滿，奔走於西歐，由各種機關雜誌，發表其言論，鼓吹其主義。當時又出版浩瀚之著作多種。千九百零五年，李寧歸國，當是時李寧已爲社會黨及革命運動最有力之指導者。屢於國會議員之選舉，及其他之政治，及社會運動，暗中大顯其神通。千九百零七年，革命失敗之後，再出國門，自是遂爲萬國社會黨本部黨員，而從事於世界的社會運動。同時由俄京發刊之泊羅達、泊洛才斯崔尼安兩機關雜誌，將己之主義宣傳於故國。自歐戰發生以後，李寧時以俄德法三國文字，對於各交戰國中穩和社會黨之妥協政策與其社會帝國主義 (Social imperialism) 大加抨擊。又爲急進社會黨萬國會議發起人之一。且爲該會最左派之領袖，大鼓吹其主義。於是俄國及歐洲各國（其中尤以瑞典法國德國爲最）社會黨中之最左派，無不崇拜李寧。而各國政府，因是遂集怨於李寧之一身。一九一七年三月，俄國革命後，李寧欲歸國，爲英法兩政府所阻止，不得達其目的。旋依瑞士社會黨員迫辣登氏之周旋，始得與

同行者三十二人，共由德國歸俄。李寧回國（一九一七年四月）後，一時大放其二十年來鬱結而未發之氣，曰推倒帝國主義，曰開闢勞兵之天下，曰排斥臨時政府，曰打破資本團銀行，曰掠奪土地，竭力發表類似無政府主義之過激社會主義。當時尙有幾分愛國精神之勞動家及兵士等，大爲之傾倒。然是年七月，所謀完全失敗，李寧及其部下，皆受德國間諜罪賣國罪之嫌疑。其聲望一時失墜殆盡。李寧因有身命之危險，偕其弟子奇拿翠氏深匿不出。俄國人士，因其避匿不出，對於彼之行爲，愈懷疑義。是時輿論，競唱撲殺李寧黨之說。彼之所以被德國間諜與賣國奴之惡名者，實因彼之回國，曾假道德國，受德國之庇護，而始能達回國之目的。而德人亦以彼之回國爲有利於德也。然不能直以德國間諜或賣國奴目李寧者，徵諸李寧過去之經歷，足爲其左證。李寧之爲人，生平抱定宗旨，始終不變更其主義者也。爲實行其主義起見，無論若何危險，皆不足以使彼屈服。彼實社會黨中最活動之奮鬥分子之首領。彼不獨以俄國社會黨總理自任，且以全世界社會主義指

揮者自居。彼所懷抱之主義，範圍至廣，不分畛域。故不獨故國之觀念甚爲薄弱，其眼中且並無德國。彼之盡力於社會主義也，惟知有目的，不選擇手段，故假借帝國主義之德國之金錢勢力，以鼓吹本國之平和主義，在彼寧以爲快心之事，至其部下，人多品雜，或有真正之德國間諜，真正之賣國奴，利用之以營私利，不能謂其必無。但不能因此而疑及李寧之志願也。此次俄國第二次革命發生，李寧突然出現，卽被舉爲新勞兵政府之首領。第二次革命之黑幕中，實李寧爲之主動，可不待言。由此觀之，其潛勢力之在過激派及該派勢力範圍內之勞兵間者，至爲偉大。第二次革命告成，李寧當國，組織勞兵政府。第一日卽發表平和速成之宣言；第二日發表土地收用之宣言；而勞動家監督工業權，及每日八小時勞動權乃繼之而設定。其後所發表之民族自主宣言書中，聲明凡在俄國國境以內之諸民族，皆得完全自治獨立，任意爲之。然政府各機關之運轉已完全停頓，政令不行，戰場之兵卒，與德兵交驩，或自由脫逃，卽實行第一日平和速成之宣言也。各地平民佔據地主之



房產，任意瓜分其土地，政府不加干涉，則第二宣言亦已實行。至擴張勞動者之權限，更不待言。各民族之自主，則芬蘭首先實行，小俄羅斯，辣得伊瓦西等亦先後實行。各處工場皆同盟罷業。勞兵政府又勒令國內非社會黨之報紙，全部停止發行。於是非難勞兵政府摧折言論之聲漸高。李寧又從而威嚇之曰：政府不日且將以該各報館之活字印機紙料，悉斷歸民有，而廣告歸政府專賣云云。一面又強迫銀行開市，如不奉命，即捕縛其重要職員。國立銀行總裁希卜夫被監禁，其武斷與專制，殆不亞於俄皇之獨裁政治。所不同者，上下倒置耳。俄羅斯人多數爲無節度無自制能力之羣衆，有向彼等提倡自由者，則一切之義務拘束皆不承認。有向彼等提倡平等者，則所有節度禮數一概抹煞。彼等之思想極簡單，頭腦極空虛，米劉谷夫等之英美式自由進步政策，不適合俄人之性格。克倫斯基似是而非之社會主義，亦不行於俄國。總之欲統治此多數無自制力之羣衆，不能說破政治之原理，惟有不明言其所以然，而用強力使之服從之一法。俄皇之政策，即取此義。現在俄國

已無皇帝，祇有李寧一派之勢力震盪全國，其政策之單純率直及其專制之處，與俄皇之政策相同。因此之故，在三月以前受間諜嫌疑之李寧，今日居然掌全國之政權，此實俄國國民性使然，亦李寧人物之偉大使然。李寧氏偉大之點有二：其學識與閱歷超出同黨，有操縱黨員之威望與手腕，隱然過激社會黨中之帝皇，其對於黨員，規律之嚴肅，完全含專制之性質，此其一也。李寧所擅之絕技，善窺人心之隱微，而巧投合之，此其二也。第二次革命以後，彼所時發之警語，極能投合俄國民衆之意氣。例如一九一六年四月杪，米劉谷夫外務卿之親英外交，正爲俄國人心所不慊之際，彼突發『倒帝國主義』之警語，使米劉谷夫退出內閣。見前敵戰線士卒倦於作戰，則慫恿『國民的媾和』，提倡『塹壕間之交驩』，以惹起戰線全體之潰散。迨聯合內閣成立，禮華夫政府之失政日甚，李寧卽以『排斥資本大臣』一語驅逐禮華夫。彼常隨人心之趨向，發明新穎簡單之警語，以迎合社會心理，其神妙不可思議。李寧不獨以此種警語誘導愚昧之民衆而使之動，且必實行之而後已。

革命以來，李寧始終主張之說爲『政權全部當歸勞兵會掌之』。遂於此次之革命見諸實行。其時時向民衆發射之警語，糜爛人心之威力，遠出於毒氣礮之上。於是乎曩聞李寧歸國而大驚失色之前任外務卿米劉谷夫泫然流涕曰，『俄羅斯終將爲過激主義之捕虜矣。』

# 俄國社會主義運動之變遷

君實譯述

俄國之革命，多與法國革命相似；惟其間有絕不相同者，則俄國革命實爲社會的革命也。或謂法國革命時，亦嘗有共產主義之唱導，似不可謂不同。然今日之社會主義，與當時之共產主義，其意迥殊。所謂社會主義者，乃產業革新之產物也。雖法國革命亦嘗呈近似社會的革命之狀；然而社會主義的革命之出現，實以今日之俄國革命爲嚆矢，此不可謂非世界文明史上最宜注意之重大事變也。著者既執是以觀俄國革命，故對於俄國社會運動之發展史，不得不加以重視矣。

俄國社會運動之歷史，略可分爲三期：一爲宣傳主義時代，（一八六〇至一八

七八年)二爲恐怖主義時代(一八七九至一八八三年)三爲結黨時代(一八八三年以後)此爲著者一人之私言,所用名稱,不過便於說明而止。卽其年代,亦僅指大體之傾向已耳。

## 一 宣傳主義時代

一八六一年,俄國開放農奴,是卽其國中自由思想發展之一現象也。此自由思想,實受法國革命之影響。以前俄國青年或醉心於刺華葉及孔士坦德之自由主義,或趨於德意志哲學之研究。當此之際,忽有與時異趣,抱西蒙氏之遺籍而得其煩悶之解決者,則赫善氏(Herzen)是也。赫氏固非祖述西蒙之人,然其社會主義的思想,實受西蒙氏之啟發。嘗謂觀俄國之社會組織,而知其所抱之理想,必可見之於實行。所謂俄國之社會組織者,蓋指農村組合(Mir)之制度而言。農村組合之土地共有制度,卽社會主義理想中共產主義之雛形,而生育其間之農民,卽

社會主義者。特若輩未嘗自覺其有若何之使命而已。設加之開發，導以建設新社會之大使命，則理想社會之實現，必可豫期。於是遂深信啓導人民爲俄國社會運動之真諦。赫氏既倡其說，巴枯寧 (Bakunin) 氏又從而實行之。卽世所謂虛無主義 (Nihilism) 是也。虛無云者，蓋表其否定一切傳說一切權威之意；但亦不過略變西歐之社會主義爲俄式而已。當此之時，僅力主個人之絕對的開放，猶未達於國際的運動之域也。

赫善及巴枯寧皆出身貴族，然繼其後之崔涅許斯克乃爲農民出身僧侶之子，此亦可注目之事也。自是以後，俄國之社會運動，漸次脫離貴族，而入於智識階級 (Intelligenza) 之手。赫善等之虛無主義者，對於西蒙之根本思想，尙未完全排斥。及至崔氏則唾棄西蒙之宗教的傾向，力唱新社會萬不可以宗教的爲基礎。於是遂變爲熱心之富里主義 (Fourierism) 者。嘗著小說一部，描寫將來社會主義的社會之狀態。蓋俄國社會主義家中說將來理想的社會之元祖也。崔氏亦與赫

氏同以農村組合爲新社會之根據。其言曰：『西歐各地，因定有無限制之私有財產制度，故欲加改革，不可無多大之犧牲。社會問題之所以囂然不寧，蓋原於此。至於吾俄則以有此農村組合故，可不致有類是之困難。』崔涅許斯克與富里之信仰者，同皆私淑於烏文（Ovchinnikov）。富里與烏文皆理想家，而崔氏亦爲純粹之理想家。彼等之理想，以爲建設新社會，使人類咸知正義，斯爲已足。此理想之勝利與其宣傳，乃其社會運動之真髓也。既以理性爲世界之制服者，則爲人類之自由與幸福而戰，自不得不屬於知識階級。故宣傳主義時代之戰士，皆係知識階級之人，其目的則在樹立啓發人民之旗幟而已。

一八七三年至一八七四年，彼等旅行國內，向人民游說新社會之福音，所謂『行於人民』運動是也。一八七六年至一八七九年間，則游說與人民共同起居之土地與自由，爲農民自身之問題。所謂『土地與自由』黨（Zemlya i Volya）是也。凡若此者，皆以同一之主張，由同一之人士所行之社會運動也。

## 二 恐怖主義時代

知識階級之啓發運動，未能奏十分滿足之成功。於是彼等遂以爲非由革命黨掌握政權，不能成真正之社會革命。然革命黨員之數甚少，欲以此少數之黨員，收成功之效，惟有從事破壞以剿滅反動主義者，乃可樹新社會之基礎。且以爲西歐諸國，其國家立於資本家之基礎，是以難於推倒。若俄國之國家，則尙懸於空中，政府雖似有強力，而實則等於無力。其首先發此思想者，實爲勃蘭基 (Auguste Blanqui) 氏。一八八一年亞歷山大第二即倒於此派之手者也。

此非常手段，因受政府之壓迫，不能生存，乃入於其後之結黨時代。但酌此主義餘流之社會革命黨，後至一九〇二年時，復採用之，特其主張，不無稍殊。在恐怖主義時代，以爲即可用此手段建設新社會，而社會革命黨之主張，則與之不同。其言曰：「吾等之目的，在使羣民盡化爲革命黨員。吾等雖要求武裝的示威運動，然此



事殊未易達到。至恐怖主義，不過爲暫時的經過的之事。特吾人今日所能行者，亦惟有此途耳。」一九一二年四月適比幹 (Sipiazhin) 之被殺，卽彼等所爲。然不出數年，因受政府祕密偵探之羅織，有力黨員，多皆喪失，其勢遂衰。

要之恐怖主義，可視爲過信個人之力之知識階級，受政府壓迫而失其思慮平衡之暫時的發作也。

### 三 結黨時代

第一第二之方法，既均以失敗終，於是始悟從前之運動，皆不免爲空想的。少數之革命家，究不足以推翻政府而開放人民。開放人民，必賴人民之自能覺醒，而社會黨組織之必要，乃因此而見。此實俄國社會運動史可特記之時期也。

一八八三年，因運動『人民自由』(Narodnaya Volya) 而失敗之亡命客，始在瑞士爲社會民主黨之組織，命名『勞動開放黨』(Osvoobodenie Truda) 其首領爲

著名之潑勒哈諾夫 (Plekhanov) 潑氏純粹爲馬克思之祖述者。於其所撰之黨綱中宣言曰：『專制之支持者，乃無智無能之農民也；革命之主動者，乃工場勞動者而非農夫也。勞動者掌握政權，卽可以防反動。故勞動者須先握政治上之實權；而革命之成功，則在勞動者之自覺。』既而其所採之方針，漸生異論，終至分裂。潑氏之意見，雖以勞動者之自覺爲前提；然其自覺有相當之順序。若妄動的革命，反足破壞此順序，而延遲理想實現之時期。主張過激論而與之反對者，則爲李寧氏 (Lenin)。於一九〇三年大會時，發生衝突，卒爲李寧派所勝，於是李派爲多數派，而潑派爲少數派焉。

勞動開放黨組織後，一八八五年，勃拉柯夫 (Blagov) 及却理吐諾夫 (Chernov) 之徒，繼述潑勒哈諾夫之思想，組織團體。一八九一年之饑饉，爲馬克思主義之謳歌。自一八九二年至一八九六年間，俄國都中之勞動團體，風發潮湧，接踵而興。其最可注意者，此等勞動團體，與智識階級，未嘗有所關係；而皆發於勞動者

自身之意，成於勞動者自身之手。勞動者以政治犯面就捕縛，蓋始於此時。

翻觀社會民主黨之黨內，其外周雖爲勞動者，而其中核，則悉爲知識階級。（外周二字，係愛哥洛夫 Боготов 之用語。）然至於此時期，勞動及新進之知識階級，對於握黨中實權之知識階級，羣抱不平；冀自能左右其黨，知識階級與勞動者之內鬩，蓋始於此。此亦勞動者之自覺上可特記之點也。

一八九七年迄一八九九年之饑饉，與一八九九年之杜蘭斯哇戰爭，因工業資本之缺乏，致增多勞動者之解雇。於是勞動者之視資本家，遂與專制政治無異，前之主張政治的革命者，至此更深信社會的革命之尤要。

社會民主黨，在勞動者方面，既得勢力，而於農民方面之革命的宣傳，亦漸次現其萌芽。於是始覺組織抵抗政府壓迫之大團體，爲不可緩。乃結合「人權擁護團」「農民社會黨」等諸團體，成一社會革命黨。此黨與社會民主黨之不同，社會革命黨並主宣傳革命思想於農民，而得之爲戰士；而社會民主黨，則以爲革命非可一

賦而及，當與其他事象，漸進的顯出。此主張之差異，常為兩派之爭點。社會革命黨之意見，以為可調和兩派者，惟私有財產之廢止與土地及大工業之國有而已。故社會革命黨，與西歐之社會黨，無直接之關係。宣傳時代之思潮，竟隨時代之趨勢，而成為結黨組織，實踐以農民為革命主動者之主張，此亦俄國社會狀態之特種現象也。

工業之發達與人智之開發，使社會增其勢力，進於自覺之域之勞動者，漸次離知識階級之手，而為真意味之羣民運動。一九〇五年之革命，其一證也。於第一第二議會中社會黨之占優勢，可以想見俄國社會中社會主義的傾向之鬱勃。於第二議會中關於農民問題之法案，可以察知社會的革命之端緒。然遇一九〇七年司徒列賓之反動政策而脆敗，尙可見人民無徹底的社會的之自覺。其後美國式大工業之勃興，與農村生活之困難，遂使俄國國民羣皆傾向於革命。而社會黨之蟄伏於假面的憲法政治之下而怠於活動者，卒於大戰爭，再露頭角矣。俄國社會

也。黨發達之經過，則大抵如是。至其社會主義之是非，則為另一問題，非本篇所能及。



# 東方文庫目錄

- |                |              |                |
|----------------|--------------|----------------|
| 〔1〕辛亥革命史       | 〔2〕帝制運動始末記   | 〔3〕壬戌政變記       |
| 〔4〕歐戰發生史       | 〔5〕大戰雜話      | 〔6〕戰後新興國研究(三冊) |
| 〔7〕華盛頓會議       | 〔8〕俄國大革命記略   | 〔9〕勞農俄國之考察     |
| 〔10〕蒙古調查記      | 〔11〕西藏調查記    | 〔12〕世界之秘密結社    |
| 〔13〕世界風俗談      | 〔14〕日本民族性研究  | 〔15〕中國改造問題     |
| 〔16〕代議政治       | 〔17〕歐洲新憲法述評  | 〔18〕領事裁判權      |
| 〔19〕新村市        | 〔20〕貨幣制度     | 〔21〕社會政策       |
| 〔22〕合作制度       | 〔23〕農荒豫防策    | 〔24〕近代社會主義     |
| 〔25〕馬克思主義與唯物史觀 | 〔26〕社會主義神髓   | 〔27〕婦女運動(三冊)   |
| 〔28〕婦女職業與母性論   | 〔29〕家庭與婚姻    | 〔30〕新聞事業       |
| 〔31〕東西文化批評(三冊) | 〔32〕中國社會文化   | 〔33〕哲學問題       |
| 〔34〕現代哲學一樹     | 〔35〕西洋倫理主義述評 | 〔36〕心理學論叢      |
| 〔37〕名學稽古       | 〔38〕近代哲學家    | 〔39〕柏格遜與歐根     |


- 〔40〕克魯泡特金  
〔41〕甘地主義  
〔42〕戰爭哲學
- 〔43〕處世哲學  
〔44〕羅素論文集(二冊)  
〔45〕究元決疑論
- 〔46〕科學基礎  
〔47〕宇宙與物質  
〔48〕相對性原理
- 〔49〕新曆法  
〔50〕進化論與善種學  
〔51〕迷信與科學
- 〔52〕笑與夢  
〔53〕催眠術與心靈現象  
〔54〕食物與衛生
- 〔55〕石炭  
〔56〕鍍錠  
〔57〕飛行學要義
- 〔58〕科學雜俎(四冊)  
〔59〕近代文學概觀(二冊)  
〔60〕文學批評與批評家
- 〔61〕寫實主義與浪漫主義  
〔62〕近代文學與社會改造  
〔63〕近代戲劇家論
- 〔64〕近代俄國文學家論  
〔65〕但底與哥德  
〔66〕莫泊三傳
- 〔67〕美與人生  
〔68〕藝術談概  
〔69〕近代西洋繪畫(二冊)
- 〔70〕國際語運動  
〔71〕考古學零簡  
〔72〕開封一賜樂業教考
- 〔73〕元也里可溫考  
〔74〕東方創作集(三冊)  
〔75〕近代英美小說集
- 〔76〕近代法國小說集(二冊)  
〔77〕近代俄國小說集(五冊)  
〔78〕歐洲大陸小說集(二冊)
- 〔79〕近代日本小說集  
〔80〕太戈爾短篇小說集  
〔81〕枯葉雜記
- 〔82〕現代獨幕劇(三冊)

A Short History of Russian Revolution in 1917

Commercial Press, Limited

All rights reserved

中華民國十二年十二月初版



回(東方俄國大革命記略一册)

(每册定價大洋壹角)

(外埠酌加運費匯費)

編纂者 東方雜誌社

發行者 商務印書館

印刷所 上海北河南路北首寶山路 商務印書館

總發行所 上海棋盤街中市 商務印書館

分售處 北京天津保定奉天吉林龍江 濟南太原開封鄭州西安南京 杭州蘭谿安慶蕪湖南昌漢口 商務印書館分館

長沙常德衡州成都重慶瀘縣 福州廣州潮州香港梧州雲南 貴陽 張家口 新嘉坡



#0

509000